


書名 廣文選八十二卷 嘉靖  
十二年序刊本  
撰者 明 劉節 輯  
卷 卷四十七  
內容分類 集-總集-詩文  
索書號 大木-集部-總集類-3  
編號 D7920300

# 卷四十七

廣文選卷第一



天地廣

天地賦

成公子安

明通議大夫都察院右副都御史大庾劉節廣



惟自然之初載兮道虛無而玄清太素紛以溷淆兮始  
有物而混成何元一之芒昧兮廓開闢而著形爾乃清  
濁剖判玄黃判離太極既殊是生兩儀星辰煥列日月  
重規以尊地靜以卑昏明迭炤或盈或虧陰陽協  
氣而寒暑隨時而推移三才殊性五行異位千變  
萬化庶類授之以形稟之以氣色表文采聲有音  
律復

彩色首頁1

東洋文化研究所漢籍目錄 編號: D7920300

東洋文化研究所漢籍目錄所藏漢籍善本文影像資料庫 索書號: 大木-集部-總集類-3

漢籍善本文影像資料庫文本 廣文選八十二卷 嘉靖十二年序刊本

版權所有: 東京大學 東洋文化研究所  
使用上的注意事項



明通議大夫都察院右副都御史大庾劉節廣

對

定都關中對

婁敬

陛下都雒陽豈欲與周室比隆哉上曰然敬曰陛下取  
天下與周異周之先自后稷堯封之邰積德累善十餘  
世公劉避桀居豳大王以狄伐故去豳杖馬箠去居岐  
國人爭歸之及文王爲西伯斷虞芮訟始受命呂望伯  
夷自海濱來歸之武王伐紂不期而會孟津上八百諸  
侯遂滅殷成王即位周公之屬傳相焉乃營成周都雒  
以爲此天下中諸侯四方納貢職道里鈞矣有德則易  
以王無德則易以亡凡居此者欲令務以德致人不欲



阻險今後世驕奢以虐民也及周之衰分而爲二天下  
莫朝周周不能制非德薄形勢弱也今陛下起豐沛收  
卒三千人以之徑卷蜀漢定三秦與項籍戰滎陽大戰  
七十小戰四十使天下之民肝腦塗地父子暴駭中野  
不可勝數哭泣之聲不絕傷夷者未起而欲比隆成康  
之時臣竊以爲不侔矣且夫秦地被山帶河四塞以爲  
固卒然有急百萬之衆可具因秦之故資甚美膏腴之  
地此所謂天府陛下入關而都之山東雖亂秦故地可  
全而有也夫與人鬪不搯其亢拊其背未能全勝今陛  
下入關而都按秦之故此亦搯天下之亢而拊其背也

封禪對

倪寬

陛下躬發聖德統承三代之祀天地薦禮百神精神所  
鄉徵兆必報天地並應符瑞昭明其封泰山禪梁父昭  
姓考瑞帝王之盛節也然享薦之義不著于經以爲封  
禪告成合祛於天地神祇祇戒精專以接神明總百官  
之職各稱事宜而爲之節文唯聖王所由制定其當非  
羣臣之所能列金將舉大事優游數年使羣臣得人自  
盡終莫能成唯天子建中和之極兼總條貫金聲而玉  
振之以順成天慶垂萬世之基從東封泰山還登明堂  
寬上壽曰臣聞三代改制屬象相因間者聖統廢絕陛  
下發憤合指天地祖古明堂辟雍宗祀泰一六律五聲  
幽贊聖意神樂四合各有方象以承嘉祀爲萬世則天  
下幸甚將見大元本瑞登告岱宗發祉闔門以候景至  
癸亥宗祀日宣重光卜元甲子肅邕永亨光輝充塞天



文粲然見象日昭報隆符應臣寬奉觴再拜上千萬歲  
壽制曰敬舉君之觴

聞樂對

中山靖王

臣聞悲者不可爲累欬思者不可爲歎息故高漸離擊  
筑易水之上荆可爲少低而不食雍門子一微吟孟嘗  
君爲之於邑今臣心結日夕每聞幼眇之聲不知涕泣  
之橫集也夫衆皁漂山聚蟲成雷朋黨執虎十夫撓椎  
是以文王拘於牖里孔子阨於陳蔡此乃烝庶之成風  
增積之生害也臣身遠與寡莫爲之先衆口鑠金積毀  
銷骨叢輕折軸羽翮飛肉紛驚逢羅潛然出涕臣聞白  
日曬光幽隱皆然明月曜夜蟲蠅宵見然雲烝列布杳  
冥晝昏塵埃拂覆昧不見泰山何則物有蔽之也今臣  
雍闕不得聞讒言之徒蜂生道遼路遠曾莫爲臣聞臣  
竊自悲也臣聞社鼯不灌屋鼠不熏何則所託者然也  
臣雖薄也得蒙肺附位雖卑也得爲東藩屬又稱兄今  
羣臣非有葭莩之親鴻毛之重羣居黨議朋友相爲使  
夫宗室擯卻骨肉冰釋斯伯牙所以流離比干所以橫  
分也詩云我心憂傷惄焉如擣假寐永歎唯憂用老心  
之憂矣疢如疾首臣之謂也

禁民挾弓弩對

吾丘子贛

臣聞古者作五兵非以相害以禁暴討邪也安居則以  
制猛獸而備非常有事則設守衛西施行陣及至周室  
衰微上無明王諸侯力政強侵弱衆暴寡海內沅敝巧  
詐並生是以知者陷愚勇者威怯苟以得勝爲務不顧



義理故機變械師所以相賊害之具不可勝數於是秦兼天下廢王道立私議滅詩書而守法令去仁恩而任刑戮墮名城殺豪傑銷甲兵折鋒刃其後民以耰鉏箠挺相撻擊犯法滋衆盜賊不勝至於赭衣塞路羣盜滿山卒以亂亡故聖王務教化而省禁防知其不足恃也今陛下昭明德建太平舉俊材興學官三公有司或由窮巷起白屋裂地而封宇內日化方外鄉風然而盜賊猶有者郡國二千石之罪非挾弓弩之過也禮曰男子生桑弧蓬矢以舉之明示有事也孔子曰吾何執執射乎大射之禮自天子降及庶人三代之道也詩云大侯既抗弓矢斯張射夫既同獻爾發功言貴中也愚聞聖王合射以明教矣未聞弓矢之爲禁也且所爲禁者爲盜賊之以攻奪也攻奪之罪死然而不止者大姦之於重誅固不避也臣恐邪人挾之而吏不能止良民以自備而抵法禁是擅賊威而奪民救也竊以爲亡益於禁姦而廢先王之典使學者不得習行其禮大不便

得寶鼎對

吾丘子贛

臣聞周德始乎后稷長於公劉大於大王成於文武顯於周公德澤上昭天下漏泉無所不通上天報應鼎爲周出故名曰周鼎今漢自高祖繼周亦昭德顯行布恩施惠六合和同至於陛下恢廓祖業功德愈盛天瑞並至珍祥畢見昔秦始皇親出鼎於彭城而不能得天祚有德而寶鼎自出此天之所以與漢乃漢寶非周寶也

白麟奇木對

終子雲



臣聞詩頌君德樂舞后功異經而同指明盛德之所隆也南越竄屏葭葦與烏魚同羣正朔不及其俗有司臨境而東甌內附閩王伏辜南粵賴救北胡隨畜薦居禽獸行虎狼心上古未能攝大將軍秉鉞單于犇幕驃騎抗旌昆邪右衽是澤南洽而威北暢也若罰不阿近舉不遺遠設官竢賢縣賞待功能者進以保祿罷者退而勞力刑於宇內矣履衆美而不足懷聖明而不專建三宮之文質章厥職之所且封禪之君無聞焉夫天命初定萬事草創及臻六合同風九州共貫必待明聖潤色祖業傳於無窮故周至成王然後制定而休徵之應見陛下盛日月之光垂聖思於勒成專神明之敬奉燔瘞於郊宮獻享之精交神積和之氣塞明而異獸來獲實矣昔武王中流未濟白魚入於王舟俯取以燎羣公咸曰休哉今郊祀未見於神祇而獲獸以饋此天之所以示饗而上通之符合也宜因昭時令日改定告元苴白茅於江淮發嘉號于營丘以應緝熙使著事者有紀焉蓋六鵬退飛逆也白魚登舟順也夫明闇之徵上亂飛鳥下動淵魚各以類推今野獸并角明同本也衆支內附示無外也若此之應殆將有解編髮削左衽襲冠帶要衣裳而蒙化者焉斯拱而竢之耳

淮南王對

伍被

王復召被曰將軍許寡人乎被曰小臣將爲大王畫計耳臣聞聰者聽於無聲明者見於未形故聖人萬舉而萬全文王一動而功顯萬世列爲三王所謂因天心以



動作者也王曰方今漢廷治乎亂乎被曰天下治王不  
說曰公何以言治也被對曰被竊覩朝廷君臣父子夫  
婦長幼之序也皆得其理上之舉錯遵古之道風俗紀  
綱未有所缺重裝富賈周流天下道無不通交易之道  
行南越賓服羗獫貢獻東甌入朝廣長榆開朔方匈奴  
折傷雖未及古太平時然猶爲治也王怒被謝死罪王  
又曰山東即有變漢必使大將軍將而制山東公以爲  
大將軍何如也被曰臣所善黃義從大將軍擊匈奴  
言大將軍遇士大夫以禮與士卒有恩衆皆樂爲用騎  
上下山如飛神力絕人如此數將習兵未易當也及謁  
者曹梁使長安來言大將軍號令明當敵勇常爲士卒  
先領士卒休乃舍穿井得水乃敢飲軍罷士卒已踰河  
乃度皇太后所賜金錢盡以賞賜雖古名將不過也王  
曰蓼太子知畧不世出非常人也以爲漢廷公卿列侯  
皆如沐猴而冠耳被曰獨先刺大將軍乃可舉事王復  
問被曰公以爲吳舉兵非邪被曰非也夫吳王賜號爲  
劉氏祭酒受几杖而不朝王四郡之衆地方數千里采  
山銅以爲錢煮海水以爲鹽伐江陵之木以爲船國富  
民衆行珍寶賂諸侯與七國合從舉兵而西破大梁敗  
狐父奔走而還爲越所禽死於丹徒頭足異處身滅祀  
絕爲天下戮夫以吳衆不能成功者何也誠逆天違衆  
而不見時也王曰男子之所死者一言耳且吳何知反  
漢將一日過成臯者四十餘人今我令緩先要成臯之  
口周被下潁川兵塞轅轅伊闕之道陳定發南陽兵守



武關河南太守獨有雒陽耳何足憂然此北尚有臨晉  
關河東上黨與河內趙國界者通國數行人言絕成臯  
之道天下不通據三川之險招天下之兵公以爲何如  
被曰臣見其禍未見其福也後漢逮淮南王孫建繫治  
之王恐陰事泄謂被曰事至吾欲遂發天下勞苦有間  
矣諸侯頗有失行皆自疑我舉兵西鄉必有應者無應  
即還畧衡山勢不得不發被曰畧衡山以繫盧江有潯  
陽之船守下雉之城結九江之浦絕豫章之口彊弩臨  
江而守以禁南郡之下東保會稽南通勁越屈彊江淮  
間可以延歲月之壽耳未見其福也王曰左吳趙賢朱  
驕如皆以爲什八九成公獨以爲無福何被曰大王之  
羣臣近幸素能使衆者皆前繫詔談餘無可用者王曰  
陳勝吳廣無立錫之地百人之聚起于大澤舊臂大呼  
天下響應西至於戲而兵百二十萬今吾國雖小勝兵  
可得二十萬公何以言有禍無福被曰臣不敢避子胥  
之誅願大王無爲吳王之聽往者秦爲無道殘賊天下  
殺術上燔詩書滅聖迹棄禮義任刑法轉海瀕之粟致  
于西河當是之時男子疾耕不足於糧餽女子紡績不  
足於蓋形遣蒙恬築長城東西數千里暴兵露師常數  
十萬死者不可勝數僵尸滿野流血千里於是百姓力  
屈欲爲亂者十室而五又使徐福入海求仙藥多齎珍  
寶童男女三千人五種百工而行徐福得平原大澤止  
王不來於是百姓悲痛愁思欲爲亂者十室而六又使  
尉作踰五嶺攻百越尉佗知中國勞極止王南越行者



不還往者莫返於是百姓離心瓦解欲爲亂者十室而七與萬乘之駕作阿房之宮收大半之賦發閭左之戍父不寧子兄不安第政苛刑慘民皆引領而望傾耳而聽悲號仰天叩心怨上欲爲亂者十室而八客謂高皇帝曰時可矣高帝曰待之聖人當起東南閭不一歲陳吳大呼劉項並和天下嚮應所謂蹈瑕釁因秦之亡時而動百姓願之若枯旱之望雨故起於行陳之中以成帝王之功今大王見高祖得天下之易也獨不觀近世之吳楚平當今陛下臨制天下一齊海內汜愛蒸庶布德施惠口雖未言聲疾雷震今雖未出化馳如神心有所懷威動千里下之應上猶景嚮也而大將軍材能非直章邯楊熊也王以陳勝吳廣論之被以爲過矣且大王之兵衆不能什分吳楚之一天下安寧又萬倍於秦王用臣之計臣聞箕子過故國而悲作麥秀之歌痛紂之不用王子比干之言也故孟子曰紂貴爲天子死曾不如匹夫是紂先自絕久矣非死之日天去之也今臣亦竊悲大王棄千乘之君將賜絕命之書爲羣臣先身死於東宮也被因流涕而起後王復召問被苟如公言不可以徼倖邪被曰必不得已被有愚意王曰柰何被曰當今諸侯無異心百姓無怨氣朔方之郡土地廣美民徙者不足以實其地可爲丞相御史請書徙郡國豪傑及耐罪已上以赦令除家產五十萬以上者皆徙其家屬朔方之郡益發甲卒急其會日又僞爲左右都司空上林中都官詔獄書逮諸侯太子及幸臣如此



則民怨諸侯懼即使辯士隨而說之黨可以徼幸王曰此可也雖然吾以不至若此專發而已

化民有道對

東方曼倩

堯舜禹湯文武成康上古之事經歷數千載尚難言也臣不敢陳願近述孝文皇帝之時當世耆老皆聞見之貴爲天子富有四海身衣弋絺足履革舄以韋帶劔莞蒲爲席兵木無刃衣組無文集上書囊以爲殿帷以道德爲麗以仁義爲準於是天下望風成俗昭然化之今陛下以城中爲小國起建章左鳳闕右神明號稱千門萬戶木土衣綺繡狗馬被繡罽宮人簪瑇瑁垂珠璣設戲車敎馳逐飾文采叢珍怪撞萬石之鐘擊雷霆之鼓作非憂舞鄭女上爲淫侈如此而欲使民獨不奢多失農事之難者也陛下誠能用臣朔之計推甲乙之帳燔於四通之衢却走馬不復用則堯舜之隆宜可與比治矣易曰正其本萬事理失之毫釐差以千里願陛下留意察之

高廟園災對

董仲舒

春秋之道舉往以明來是故天下有物親春秋所舉與同比者精微眇以存其意通倫類以貫其理天地之變國家之事粲然皆見亡所疑矣按春秋魯定公哀公時季氏之惡已孰而孔子之聖方盛夫以盛聖而易孰惡季孫雖重魯君雖輕其勢可成也故定公二年五月兩觀災兩觀僭禮之物天災之者若曰僭禮之臣可以去已見臯徵而後告可去此天意也定公不知省至哀公



三年五月桓宮釐宮災二者同事所爲一也若曰燔貴而主不義云爾哀公不能見故四年六月亳社災兩觀桓釐廟亳社四者皆不當立者以示魯欲其去亂臣而用聖人也季氏亡道又矣前是天不見災者魯未有賢聖臣雖欲去季孫其力不能昭公是也至定哀廼見之其時可也不時不見天之道也今高廟不當居遼東高園殿不當居陵旁於禮亦不當立與魯所災同其不當立又矣至於陛下時天廼災之者殆亦其時可也昔秦受亡周之敝而亡以化之漢受亡秦之敝又亡以化之夫繼二敝之後承其下流兼受其猥難治甚矣又多兄弟親戚骨肉之連驕揚奢侈恣睢者衆所謂重難之時者也陛下正當大敝之後又遭重難之時甚可憂也故天災若語陛下當今之世雖敝而重難非以太平至公不能治也視親戚貴屬在諸侯遠正最甚者忍而誅之如吾燔遼東高廟廼可視近臣在國中處旁仄及貴而不正者忍而誅之如吾燔高園殿乃可云爾在外而不正者雖貴如高園殿猶燔災之況大臣乎此天意也臯在外者天災外臯在內者天災內燔甚罪當重燔簡罪當輕承天意之道也

郊祀對

董仲舒

廷尉臣湯昧死言臣湯承制以郊事問故膠西相仲舒臣仲舒對曰所聞古者天子之禮莫重於郊郊常以正月上辛日者所以先百神而最居前禮三年喪不祭其先而不敢廢郊郊重於宗廟天尊於人也王制曰祭天



地之牛角繭栗宗廟之牛角握賓客之牛角尺此言德滋美而牲滋微也春秋曰魯祭周公用白牡色白貴純也帝牲在滌三月牲貴肥潔而不貪其大也凡養牲之道務在肥潔而已駒犢未能芻秣之食莫如令食其母便臣湯謹問仲舒魯祀周公用白牡非禮也臣仲舒對曰禮也臣湯問周天子用騂剛群公不毛周公諸公也何以得用純牲臣仲舒對曰武王崩成王幼而在襁褓之中周公繼文武之業成二聖之功德漸天地澤被四海故成王賢而貴之詩曰無德不報故成王使祭周公用白牡上不得與天子同色下有異於諸侯臣仲舒愚以爲報德之禮臣湯問仲舒天子祭天諸侯祭土魯何緣以祭郊臣仲舒對曰周公傳成王成王遂及聖功莫大於此周公聖人也有祭於天道成王令魯郊也臣湯問仲舒魯祭周公用白牡其郊何用臣仲舒對曰魯郊用純騂剛周色尚赤魯以天子命郊故以騂臣湯問仲舒祠宗廟或以鶩當鳧鶩非鳧可用否臣仲舒對曰鶩非鳧鳧非鶩也臣聞孔子入太廟每事問慎之至也陛下祭躬親齋戒沐浴以承宗廟其敬謹柰何以鳧當鶩鶩當鳧名實不相應以承太廟不亦不稱乎臣仲舒愚以爲不可臣犬馬齒衰賜骸骨伏陋巷陛下乃奉使九卿問臣以朝廷之事臣愚陋曾不足以承明詔奉大對臣仲舒冒死以聞

雨雹對

董仲舒

元光元年二月京師雨雹鮑敞問董仲舒曰雹何物也



何氣而生之仲舒曰陰氣脅陽氣天地之氣陰陽相伴和氣周迴朝夕不息陽德用事則和氣皆陽建巳之月是也故謂之正陽之月陰德用事則和氣皆陰建亥之月是也故謂正陰之月十月陰雖用事而陰不孤立此月純陰疑於無陽故謂之陽月詩人所謂日月陽止者也四月陽雖用事而陽不獨存此月純陽疑於無陰故亦謂之陰月自十月以後陽氣始生於地下漸冉流散故言息也陰氣轉收故言消也日夜滋生遂至四月純陽用事自四月以後陰氣始生於天上漸冉流散故云息也陽氣轉收故言消也日夜滋生遂至十月純陰用事二月八月陰陽正等無多少也以此推移無有差慝運能抑揚更相動薄則薰蒸而風雨雲霧電雷雹雹生焉氣上薄爲雨下薄爲霧風其噫也雲其氣也雷其相擊之聲也電其相擊之光也二氣之初蒸也若有若無若實若虛若方若圓攢聚相合其體稍重故雨乘虛而墜風多則合速故雨大而踈風少則合遲故雨細而密其寒月則雨凝於上體尚輕微而因風相襲故成雪焉寒有高下上暖下寒則上合爲大雨下凝爲冰霰雪是也雹霰之流也陰氣暴上雨則凝結成雹焉太平之世則風不鳴條開甲散萌而已雨不破塊潤葉津莖而已雷不驚人號令啓發而已電不眩目宣示光耀而已霧不塞望浸淫被泊而已雪不封條凌殄毒害而已雲則五色而爲慶三色而成禱露則結味而成甘結潤而成膏此聖人之在上則陰陽和風雨時也政多紕繆



則陰陽不調風發屋雨溢河雪至牛目雹殺驢馬此皆陰陽相盪而爲侵沴之妖也敞曰四月無陰十月無陽何以明陰不孤立陽不獨存耶仲舒曰陰陽雖異而所資一氣也陽用事此則氣爲陽陰用事此則氣爲陰陽陰之時雖異二體常存猶如一鼎之水而未加火純陰也加火極熱純陽也純陽則無陰氣息火水寒則更陰矣純陰則無陽加水火熱則更陽矣然則建巳之月爲純陽不容都無復陰也但是陽家用事陽氣之極耳齊麥枯由陰殺也建亥之月爲純陰不容都無復陽也但是陰家用事陰氣之極耳薺麥始生由陽升也其尤者葦薺死於盛夏款冬死於嚴寒水極陰而有溫泉火至陽而有涼燭故知音不得無陽陽不容都無陰也敞曰冬雨必暖夏雨必涼何也曰冬氣多寒陽氣自上躋故人得其暖而蒸成雪矣夏氣多暖陰氣自下昇故人得其涼而上蒸成雨矣敞曰雨旣陰陽相蒸四月純陽十月純陰斯則無二氣相薄則不雨乎曰然純陽純陰雖在四月十月但月中之一日耳敞曰月中何日曰純陽用事未夏至一日純陰用事未冬至一日朔旦夏至冬至其正氣也敞曰然則未至一日其不雨乎曰然頗有之則妖也和氣之中自生災沴能使陰陽改節暖涼失度敞曰災沴之氣其常存耶曰無也時生耳猶乎人四支五臟中也有時及其病也曰支五臟皆病也敞遷延負墻俛揖而退

三仁對

董仲舒



臣聞昔者魯君問柳下惠吾欲伐齊何如柳下惠曰不可歸而有憂色曰吾聞伐國不問仁人此言何爲至於我哉徒見問耳且猶羞之况設詐以伐吳乎由此言之粵本無一仁人者正其誼不謀其利明其道不計其功是以仲尼之門五尺之童羞稱五伯爲其先詐力而後仁誼也苟爲詐而已故不足稱於大君子之門也五伯比於他諸侯爲賢其比三王猶武夫之與美玉也王曰善

廣文選卷第四十七

江都蕭澗校

廣文選卷第四十八

明通議大夫都察院右副都御史大庾劉節廣

對二

雨雹對

蕭長倩

春秋昭公三年大雨雹是時季氏專權卒逐昭公鄉使魯君察於天變宜亡此害今陛下以聖德居位思政求賢堯舜之用心也然而善祥未臻陰陽不和是夫臣任政一姓擅勢之所致也附枝大者賊本心私家盛者公室危唯明主躬萬機選同姓舉賢材以爲腹心與參政謀令公卿大臣朝見奏事明陳其職以考功能如是則庶事理公道立姦邪塞私權廢矣

伐匈奴對

蕭長倩